

四庫全書

集部

欽定四庫全書

柯山集卷六

宋 張耒 撰

五言古詩

休日同宋遐叔詣法雲遇李公擇黃魯直公擇烹
賜茗出高麗盤龍墨魯直出近作數詩皆奇絕坐
中懷无咎有作呈魯直遐叔

休日不造請出遊賢友同城南上人者宴坐花雨中金

貌散香霧寶鐸韻天風鳥語演寶相飯香悟真空尚書
三二客淨社繼雷宗黃子發錦囊句有造物功握中一
寸煤海外千年松誰降午睡魔賜茗屠團龍晁子卧城
西咫尺不可逢豈無坐中客終覺少此公歸帽見新月
撲衫暮塵紅困眠有餘想卻聽寺樓鐘

掛虎圖于寢壁示秬秣

畫工出幻事縞素發原藪蕭蕭白茅低凜凜北風走耽
然老於菟舉步安不驟目光炯雙射怒吻呀欲受彼彪

擲其旁文彩淡初就雖然竊形似已足走百獸煩君衛
吾寢振此蓬華陋坐令盜肉鼠不敢窺白晝

神運殿望香爐天池等峰晚宿官廳明日早發

遠公不出山坐受天龍供地祇敢愛寶木石親輸送巖
巖千年屋山立屹不動風雲宿脩梁星斗近華棟亭亭
碧香爐蒼苔時自涌五雲嚴擁衛天樂下鸞鳳神池閱
寶象光怪發巖洞誰能陟其巔手攬湖龍輕東堂黃金
藏龍像儼環拱蕭條亡國輦拙樸昔誰用掃堂為一睡

清極乃無夢思歸戒晨發結束勤僕從鴻鐘振林莽月
落朝嵐重再往墮渺茫猿鶴應嘲諷

贈張公賁

我昔為諸生奉書諫議公後來辱稱獎禮數賓客同決
科甫弱冠年少氣如虹歸來陪後乘不責醉後恭孤舟
梁宋郊旅態萃百窮拜公睢陽府笑語若春風人事不
可期俯仰異吉凶平生丹竈術馬鬣哭新封十年得吾
弟懷舊涕沾胸清平守家法眉宇肖德容交臂是非外

為僚兄弟中東軒語長夏葵竹羅青紅西舍雪夜懽玉
顏醉瑤鍾欲飲徑相就三更叱閤翁鯨吸絕遺滴山顏
信傾峰搜抉盡醬茹楂梨倒筐籠通宵兩沈醉午起頭
如蓬人生定當爾事去挽驚鴻河梁繫君馬一笑喜相
逢憐君碧紗幌夜淚哭葦叢我方困齏鹽酸寒官辟誰
同尋舊游地塵壁罨絲蟲啼鳥古寺間夏陰小園空酒
市逢好好琵琶失瓊瓏歌舞一分散賓僚亦西東忘情
猶一歎齊物論非通官冷隱朝市端能信予慵人生當

富貴子盍自磨礪便當隱五車一一貯心胸功就螳作
埳叢成蛇化龍北郊分袂歸作惡驚兒童長謠代晤語
發子一笑哄

離黃州

扁舟發孤城揮手謝送者山回地勢卷天豁江面瀉中
流望赤壁石脚挿水下昏昏烟霧嶺歷歷漁樵舍居夷
實三載隣里通假借別之豈無情老淚為一洒篙工起
鳴鼓輕艣健于馬聊為過江宿寂寂樊山夜

宿樊溪

黃州望樊山秀色如可攬
扁舟橫江來山脚繫吾纜
大川失洶涌淺水澄可鑒
北風吹疎雨夜枕舟屢撼
齊安不可望滅沒孤城暗
奔流畧溪口龍蜃屢窺瞰
平生千金質戒懼敢忘暫
茲遊定何名耿耿有餘念

道士磯

匡廬奠九江苗裔遍南服
橫江蔽原野內外實一族
危磯插江生石色擘青玉
蛟龍穴亂石猱攫在喬木
我行

李冬月江蹟在山腹扁舟如鏡面清淨不可觸躋攀既
不可千古長幽獨緬想遷古初巢居戒樵牧

離樊口宿巴河遊馬祈寺

扁舟下樊溪江南正清瀉曉登巴河岸極目望春野步
尋修竹寺古木爭偃亞云昔孫仲謀刑牲致師禡雄圖
邈已矣英槩足悲咤石梯造雲霧丹白開廣廈山僧安
寂寞畏冷不出舍勞生遇閒境頗使我心寫晚江平若
席風勢欲相借

龜陵灣阻風三日遙禱孤山而風止

積水多疾風三日阻我舟天寒波濤惡岸窟騰龍虬五
更船篷鳴冷風入衾裯平明諸山雪爛漫鋪琳球篙工
笑相顧拍拍我船頭水魄小孤神霧鬢橫星眸倉卒禱
即應知我厭滯畱稍晴景物好柳色含新柔春風我故
舊迎我入東州

自離富池凡三禱順濟龍求便風皆獲應又風日
清霽舟行安穩委曲如所欲感而成詩

旗尾指船頭篙工告風便張帆弛雙艣去勢如脫箭船
傍兩高山過目若流電波平船穩馳客寢兀未變吾聞
西江龍神力回寓縣往來萬夫禱正直乃獲願嗟予何
所恃誠確無所薦神豈哀我窮有賜不待獻乃知人窮
我本不坐神譴人間事若異未易以言辯坐令千里遠
近若在几研慙非謝宣城攬筆賦淨練

出山

青山如君子悅我非姿媚相逢一開顏便有論交意今

晨決然去慘若執我袂謂山無見留此事寧久置道邊
青髮翁下有白玉髓斲之龍蛇窟自足飽吾世平生耽
幽獨乃若忘朝市一官等塵垢安得敗成計草堂醉老
子虎溪大開士寄語二主人為留三畝地

朝雨

幽居感節物僧舍值朝涼空簷落寒雨滴滴響秋堂低
飛林間翻濕雨不能翔危葉別故枝幽花泣晚芳悠悠
清夜眠促織催朝光日月愴已徂吾行獨迷方采采幽

圃蘭歲晚日馨香君子健明德勿為兒女傷

離陽翟

驅車發潁川回望失嵩少霜氣塞層空黯澹寒日曉
原田際天平百里見飛鳥累累道傍丘石獸卧衰草不
誰氏碑剝裂偶未倒支離見隸字書帶漢筆妙遺墳不
可問文彩竟何效永年恃金石此計久可笑昔遊已三
歲存歿傷懷抱飽諳人世憂安得身不老

次潁川

許昌古名都氣象良未替客子遠道來塵埃滿襟袂黃
昏造孤驛買飯啣枯葢庭寬蟾蜍高霜氣徹寒被賴攜
朱提杯可具一飯費無人勸我酌孤獨伴客醉笙簫誰
家樓語笑月中市何人不行樂而我獨涕淚夜長更漏
稀風急鼓聲駛天明卷席去行止隨所值

昭陵六馬唐文皇戰馬也琢石象之立昭陵前客
持石木示予為賦此

天將剗隋亂帝逢六龍來森然風雲姿颯爽毛骨開颼

馳不及視山立儼莫回長鳴馳八表擾擾萬駕駘秦王
龍鳳姿魚鳥不足摧腰間大白羽中物如風雷區區數
豎子縛取如提孩手持掃天帚六合無塵埃艱難濟大
業一一非常材惟時六驥足績與英衛陪功成鏘八鸞
玉輅行天街荒涼昭陵闕古石埋蒼苔

同楊十二緱氏寺宿草酌張正民秀才見訪

契濶千里別惻愴難具言殷勤一宵語願子未即眠空
堂燈火青旅褐借僧氊勞一杯酒不解道路寒經年

相從樂既別亦茫然人間事盡爾聚散亦何歎但悲多
難身尚獲朋友歡間關百憂中一笑有萬錢張子年未
冠已雄羣少年巉巉坐我側紫眸秀雙顴壯志激衰懦
清談破愁煎天明即分散奈此情悵悵

初到都下供職寄黃九

千里不相見勞勞復何辭不遠一城中耿耿令我思
舍酒家樓推爐卷其旗鼠壤敗晨炊守翁噪羣兒馬傍
挾雨羸雙踵待刻移五日長安塵故山夢中歸何以洗

我心望君青松姿懷情久不吐古屋絃悲詩

次韻魯直夏日齋中

文章慙骭髀談舌罷雋永年來屏百事但願兩耳靜黃
公安禪室不覺在市井客來飽清風可是徒造請犧尊
與社樗妄計幸不幸願君妙觀察金門等雲嶺

晚歸寄无咎二首

雨氣入古屋薄帷生夜清想君擁鼻坐端學苦吟生泥
深欺我馬歸卧日半楹浩然有奇想非子定誰評

屋東雲移山屋西日半壁餘天一劍清遠雨萬絲白官
事癡可了未遭官長責惟應晁夫子不可別頃刻

送呂際秀才南歸

咽咽幽谷泉蕭蕭秋竹風豈不愛孤潔但傷愁且窮呂
子南國秀滄溟貯其胸出試輒不偶低頭避兒童離家
五千里客飯苦不豐冷落卧寒齋苦吟和秋蟲昨者授
我詩九嘆閱未終欲知作者心但視讀者容文章出貧
賤此事今古同但願子富貴不願文日工今日告我別

出門若驚鴻各在天一方何當復相逢

西山寒溪

茲行頗間暇聊此山水間幸有所携人臭味同一源杉
松鳴古剎始覺此溪寒孤亭出屋背石磴相牽攀釋子
具粗糲雖貧有餘歡午登西山去路作九曲彎山禽慣
不驚夏木秀且繁緬懷紫髯公奠玉祠天壇豪強有遺

韻興廢無畱觀空宮一泓泉引予掬清甘

案此二句一本作眼明宮

問泉引手
掬清甘

至人悲熱惱遺此消昏煩我茶非世間天上

蒼月團為爾惜不得烹淪澆晨餐深谷晚易陰快雨時
斑斑但見夾道松龍髯濕蒼顏念我亦閒人屏居閉柴
闥不使倒珠玉濟我胸中慳之官亦漫浪遇勝卻盤桓
平生據頑鈍信命傲憂患言歸徒旅疲就蔭休征鞍卻
視來時舟一葉繫荒灣

送張天覺使河東席上分題得將字

張侯蜀都秀玉立身堂堂手持明光節六月登太行三
晉雄中夏朔方臨大荒傳聲賢使者父老相扶將控弦

百萬戶十年廢耕桑但使把鋤犁自然息柎楊主人延
閣老別酒泛蘭觴寄聲梁諫議欲試紫參方

原注梁欲
寄上黨參

久未
至也

答仲車

先生居山陽時事不挂齒讀書逾五車不肯著一字今
朝苦歎嗟告我將老矣我意與子殊欲去依禪子

和仲車元夜戲述

華燈耀廣陌皎月臨重城惟我二三子柴門通夜扃展

書對明燭濁酒徐徐傾崢嶸千萬慮一醉皆能平

和魯直

濟物非僕僕功名愧無心倚市安能美汲泉不厭深
老人夙有尚鉗鉢好叢林安能紅塵裏徒使老駸駸

書館直舍

紫禁斷人聲蓬山轉春日樓外晚鼓傳城陰衛蕃出
循除擷新秀紅紫間疎密倚天黃金闕龍虎氣鬱律
明時賦鉛槧寓直守編帙疎閒謝裨補歲月感飄忽
謝公山

林賞不為軒冕屈體道無朝野達情慙利物

宣城至日謁天慶觀行香呈郡僚

溪山慘殘歲况乃值深冬清晨率其屬肆禮凝琳宮漠
漠冒原露淒淒隔水風南方異氣候霜葉未全紅忽憶
簪史筆早趨闕蒼龍拜舞東閣上佳氣鬱葱葱談笑出
右掖交游盡英雄老大心已矣依然魂夢中

秋日獨酌懷榮子邕

新秋一盃酒風雨早涼天眷言西鄰友咫尺莫能前豈

無病羸馬泥滑不勝鞭
端居何為者落莫掩書眠
高柳颯已疎碧草畱餘鮮
衰懷感徂節客舍悲流年
孤吟誰與和獨酌還醒然
新晴野路乾期子南山邊

夜初涼

庭木舞風雨清秋來我堂
衾裯偃宵寐燈火照新涼
昔我來清潁庭花有晚芳
坐看桐葉暗已近菊枝黃
歲月忽流駛形骸變老蒼
淹畱應有命通塞詎能量
寂歷年華晚優游永日長
憂時非我事黃卷有虞唐

題陸羽祠堂兼寄李援援有詩殊佳二首

陸子不可招寥寥風月魂空堂掩遺像幸此配老禪舉
世人澆薄云誰知子賢竟陵樵牧地陳迹豈復存我欲
歌子詩三歎撫無絃瓦登薦秋菊酌此石井泉

清詩弔陸子味若堂下泉陸子骨已朽青松代之言松
亦安能言風至時蕭然至談非牙舌陸子意已傳

萬松亭有感

微雨濕青松松間多好風翠光濃欲滴對舞千蛟龍可

惜青玉釵道邊委蒿蓬幽人不汝棄應有綠毛翁

今旦

今旦寒氣至晨坐進一杯一杯未能已三酌竟空壘我
有胃臆事欲言誰使陪往往中夜歎鬱結無由開賴此
樽中君破悶有後來時時從之遊報我以歡哈古國多
寒肴老妻治炮煨誰云一日富此價萬瓊瑰

摘梅花數枝挿小瓶中輒數日不謝吟玩不足形
為小詩

疎梅揀書瓶潔白滋媚好微香悠然起鼻觀默自了秀
色定可憐仙姿寧解老禪翁心土木對此成魔惱

霜後步西園

濃霜失暄妍短日淡無色回風振中園搖落聲策策草
根飢鳥啄飛舞時嘖嘖野荒無遺粒卒歲將何食鮮鮮
西墻下幽草弄寒碧四時不吾欺聊假汝頃刻

冬懷三首

悲臨奏已罷落月在西壁卧聞中林鳥先曉鳴嘖嘖爾

求亦易供固合事安息夜歸陵旦起何爾更勞役乾坤
擾萬物不使輕有獲無求良獨難何以休吾力

揚雄老不遇寂寞玩文史厠身虎狼間乃卒脫其死中
恬遺外慕獨樂異衆喜但有載酒人何用求知已

年來百事懶惟樂靜中趣天寒無來客終日常閉戶進
取乏時才窮通有天數委身付造物已矣隨所遇

感春三首

東風吹桃李花落已滿地搖搖新柳枝薄蔭纔可庇誰

云同一時榮謝兩異意由來何足較要之歸一致
默坐不復出浮雲作朝陰離離簷間花隨雨下故林物
色一如此朱顏坐凋侵自歌陽春曲吾不待知音

午日步西園繁花亂相照夭夭海棠枝顧我如欲笑殷
紅點輕素含吐皆窈窕持贈東隣子願言論久要

春日雜詩六首

啼鳥喚我覺簷日行且午累累出葉鶯庭雀鳴欲乳妻
兒病酒睡雞犬樂其侶風光不我違舍醉何有度

東風入我園落落如急霰感之復攜酒撫樹為三歎
離牆間草滿地不可踐陰陽本無情榮謝欲誰怨

春晏百草秀野花無復名悲哉桃李闌念此聊掇英
翩雙飛蝶天靜午日晴悲憂浪自苦有酒但知傾

堂南老榆柳清陰漸交映飄飄風花乾渥渥雨葉盛
鳴日方遲客去門逾靜自無濟世畧耿耿欲誰省

三月行復至青春坐侵尋飛花去寂寂新葉來駸駸
日照芳草荒園亂鳴禽朱顏任自老安事累吾心

東風忽無情吹我園中花繁紅與艷紫零落委泥沙鳴
鳥亦何事啾啾竟諠譁須知盛已極委棄欲誰嗟

官閒

官閒吏歸早歲晏寒欲盛槐稀庭日多鳥下人語靜幽
花破寒色過雁驚秋聽酒賤莫厭沾北風行欲勁

秋池

平生落寞意况此秋池側寒水靜無波衰荷委餘碧蕭
蕭動風鬢照影感新白來往雙浴鳬爾生真自得

雜咏三首

隆中卧龍公平昔事耕釣無言顧同儕高視獨長嘯彼
寧惜開口顧爾非同調何事逢玄德曹孫一言料

六槐當我庭春葉密如幄朝來南風起已見萎葉落盛
衰同時來豈必待蕭索鄙哉兒女癡倩倩情所樂

鳥鳴高屋上飢顧朝求食擾擾市井人日夜衣食迫豈
伊理當然或者養未得我歌南風詩歸坐還歎息

飛雲

欽定四庫全書

卷六

去

時雨久不施飛雲作朝陰茫茫中原麥賴此三日霖朝陽忽清霽披露南山岑雖無濟物跡膏澤在民心

和應之燈蛾

萬物皆畏死爾生何獨愚由來附炎熱鮮不喪其軀淺淺權利客蹉蹉輕薄夫高門甚烈火相勸以奔趨

自黃州至巴河遊靈巖寺觀孫仲謀刑馬壇相傳權于此刑馬祀江神遂提師伐壽春云

喬木隔塵埃華堂敞深僻人靜好鳥鳴睡餘疎雨滴悲

愁感蕭瑟弔古披荒寂尚溯紫髯翁誓師沉馬壁

雜詩

獨居無與往况此陰雨天起來復何有詩書散我前偃
卧一榻上讀書疲復眠經綸負夙志跌蕩窮吾年

搗藥

指可握而足臂可攘無他何為勤藥物杵臼日諠譁指
臂何與人正欲使其佳念此慙各生達人其我嗟

烏白

烏白強知曉
曉曉鳴暗天
我事不須早
援衾且復眠
朝暉方曠曠
慘涼蔽清妍
且復待午景
負此簷間暄

春林

春林露如雨
蕭蕭曉花寒
引手攀高紅
微香來鼻端
何以比芳潔
置之青玉盤
持歸供像佛
相對淡無言

華月

華月流春宵
散我高林影
披衣步其下
受此掃地靜
吾心方浩然
萬境一澄瑩
徙倚玉繩低
寂寥沈遠聽

離楚夜泊高麗館寄楊克一甥四首

去城未五里夜纜繫衰柳水亭暗風雨人散聞吠狗平生足羈旅況此還往久有感不自知淒然獨回首

水天夕雲重不雨衣自濕夜寒更士語難唱舟子急黃數宿莽蒼茫暗原隰高城亦何有倚牆成獨立

客去水關閉疎燈亦復收川鳴半夜雨卧冷五更秋扁舟已寒暑冉冉真乘桴一燈照客睡短夢良悠悠

士師我自出爽邁凌清秋年少不飲酒昏燈夜問囚爾

家外大父聽獄代其憂備飢朝煮飯驅蚊夜張幃獄成
上府時稽顙呼張侯

原注先子治獄卹囚最有恩事載墓刻

恕心臨縲紲相

盜以戈矛無令市死厲請帝號重幽

柯山集卷六

欽定四庫全書

柯山集卷七

宋 張耒 撰

五言古詩

三月小園花已謝獨芍藥盛開

靄靄春日晚寂寂新陰繁千紅與萬紫盛極一時闌西
堂晚芍藥百萼乘露鮮紅妝諸美人錦繡富春妍東風
時過之舞態低昂翻折贈懷溱洧感之為三歎

題焦山

焦山如伏龜萬古浸碧浪舉頭北顧海尾負金剝壯我
聞城東樓秀色日相向松杉數毛髮人物見下上欲携
浮丘公據殼恣潛漾仙風如見引金闕或可訪

春日雜興四首

桃李用事辰鮮明奪雲綺繁華一朝去默默慙杞梓時
徂鷹化鳩地遷橘為枳獨有羨門生後天猶不死

昔我遊京室交通五陵間主客各英妙袍馬相追攀千

金具飲啜百金顧吹彈纓弁羅廣席當頭舞交竿鮮妝
耀淥酒錦纈生風瀾燈燭暗夜艾士女紛相班歡娛易
徂歆轉眄如飛翰疊疊負孤願離離銜永歎山鳥窺茗
飲簷花笑蔬餐棄捐勿重陳事定須蓋棺

客從遠方來遺我昭華管吹之幻人心異境生虛竅礧礧
青嶂橫泱泱春流滿馬蹄交狹斜車轂錯平坦士女競
芳辰禽魚蔭修筍依微認涕笑凌沉見纖短停吹斂泯
滅耿耿復空館靈物信所直顧恨知音罕

潭潭故邑井猗猗上宮蘭不食自清潔莫服更幽閒志
士恥窮極卷迹甘饑寒佳辰邈良覲觸物懸悲端八途
眇回遠經歲曠音翰豈不慕裘馬詭得非所安蟬冕多
休迫繩樞憂患枉尋竟何補方拙誠獨難

出長夏門

原注初
望龍門

出郭心已清青山忽相對游人傍流水俯仰秀色內誰
張蒼玉屏中斷神斧快清伊瀉其間銀漢曳天派參差
樓觀出杳靄林麓遶巖聲答遠響水影弄空翠同遊得君

子

原注同
榮教授

興與烟霞會選勝雖自茲高懷已塵外

飯昭果寺

飄然乘興遊
散酒笑俗具
僧居致野飯
草草亦有趣
山僧慣迎客
煮茗新泉注
岩花得春遲
晚秀見紅素
蕭蕭野市井
人物自來去
溪光送孤舟
石色照素樹
題名掃高壁
歲月記所遇
書罷迹已陳
出門猶回顧

渡伊水

雙崖若爭妍
秀色日相射
遊人誇水東
揮榜渡清瀉
潺

潺溪邊風五月自瀟洒中流望南北河漢自天下嗟予
水鄉客塵土困蹈藉江湖久懷歸無地稅征駕臨流動
長想照影久悲咤滄洲倘有歸功業付高謝

白公祠

斯人不可見千古懷清風猶想鸞鳳姿脩然山水中空
祠遺像儼過者為肅恭同時富貴人泯滅知何窮公惜
得所遇慨然屢輸忠一傷巧舌刀泯默類瘖聾出處竟
無禍卷舒詎知蹤被獲空歎麟不制方為龍

上皇龕

升危躡石梯已覺毛骨異玄龕剖山腹六月霜雪至佛
臺磨青瑤紺滑不留水巍巍數天人蒼玉刻冠佩老僧
拂高崖上有昔人字國都已蕭瑟山澤隱遺事西軒俯
空闊晝夜納蒼翠卜築莫後時林中有餘地

石樓

清溪若奔虬八鎖束其頸犇騰去莫脫擺掣姿驍猛嘈
嘈戰風霆萬鼓助其勁聲驅石崖動氣抱晴日冷我來

怯初登注視久乃定悠悠山川濶寸目羅萬景平生林
野趣踈放謝鞭警會期山月出一嘯清夜永

上方

足躡青玉磴躋攀不知勞回頭瞰木杪始覺所厯高孤
鳥去滅沒奔溪深怒號白日當畫梁青雲送微颺坐久
神慮平微涼清骨毛但警塵垢容俯仰近赤霄古壁有
遺字昔人嗟寂寥南風不知暑古木常蕭蕭

三龕

萬穴列巖壁三龕獨雄夸封山鑿其骨開像儼且呀悲
哉輕人功不計歲月賒像成竟何補國破荒蓬麻悠悠
清伊水去去縈山斜晚渚栖暝鷗夕波戰餘霞陵谷良
未遷古今如轉車應有千年鶴歸顧如咨嗟

晚飯寶應

晚風吹古栢落照明空山深行得寶剎畦嶺相回環人
遠草木邃境幽魚鳥閑道人掃華堂延我具晚餐齋庖
野菊美石井新泉寒既飽陟上方浮香出林端平生麋

鹿志強學伏車轅塵懷造勝絕欲去猶三數

廣化遇雨

浮雲蔽高峯臺殿延晚色風聲轉谷豪雨脚射山白東
樓瞰虛明龍甲排松栢蕭森異人境坐視動神魄撞鐘
寺門掩晚霽尚殘滴相携下山去塵靜馬無跡歸來解
鞍歇新月如破壁但恐桃花源回舟已青壁

寄子瞻舍人二首

皎皎連城壁實惟天地珍足傷曾不售寶氣終氤氲山

川媚餘秀星斗攬奇氛終然不可掩三浴被埃塵天王
齋戒受嚴庭具九賓貯之黃金臺籍以九龍茵事稱忘
禮厚人誰駭其新車輪走四方爭覩快一陳無瑕故易
傷歛輝志乃神

紛紛名利場向背不知醜翟公書其門客態自如舊勢
去競詆沮有餘焉升斗高賢少畦畛小子多狀候退之
呼字生房相肆琴叟事奇出意表欲辯不及口神明勞
忠孝福祿日方厚防微無早計求福常恐後

贈楊念三道孚

黃鶴樓前月清輝千里寒娟娟過江北送子別長安長
安百萬家車馬無時閒中天聳觀闕四海會衣冠憐爾
薜蘿子豪華駭新觀蕭蕭囊中句饑坐奏清彈漫郎久
不悵逸思生風翰寄聲武昌魚欲從傖父餐

曉赴秘書省有感

桃李欲開時長安春正好晴空倚閭闔朝日散馳道雲
收龍蛇榜爛爛金碧曉清都不容塵虎士守洒掃家無

當關警襟袂免顛倒何慙驅數段吾事不須早儒生近
卜祝本自異時好聖朝尚文雅詔使窺鴻寶平生一盃
酒江海送吾老靜喧非人事不得守懷抱跳梁干造物
乃取鏐錙諂委懷隨所遭千葉纔一笑

贈无咎以既見君子云胡不喜為韻八首

平生懷想人握手良未易接君同舍歡此事非此世十
年淮海夢一笑相逢地投分白首期願言何有既

賢愚譬觀形美醜不自見醫肱待三折劍鐵要百鍊磨

君古青銅汰簡寄明辨一智出千愚食芹敢忘獻

文風還正始磊落有諸君長者進後生亦使我有聞譬
如狸與虎偶使並稱文終然不可及困我力空勤

文衰東京後特起得韓子支撐誹笑中久乃化而靡籍
湜既洒掃後生始歸市垂君拯溺手請效我一指

詩壇李杜後黃子擅奇勲平生執羈勒開府與參軍舉
詩秉筆徒吟哦謾云云安知握奇律一字有風雲

觸有羸其角進有跋其胡膏車秣吾馬白日在修途雖

乏亡何杯頗多未見書力學致事功良田本深鋤

黃子少年時風流勝春柳中年一鉢飯萬事寒木朽室
有僧對談房無妾持帚此道人人事誰令予獨不

南山縛虎師肯顧世書字揚眉哦楚喉鼎畔倒侯喜詩
聲一蒼蠅下到霹靂耳庸庸老尋常物外有奇偉

昨夜月中一睡殊有秋色覺書所見戲呈道孚

幽人息遙夜四聽市聲寂月華清可掬天色紺欲滴候
蟲先知秋微響出陰壁精熒高露濕斷續殘河白興懷

我自出抱器方待擇感時當有作陋巷奏金石予方問
農圃朝市嗟掃迹先寒戒裘褐歲暮養老客

東園

荒園何所有落葉與衰叢含芳未肯吐惟有木芙蓉黃
菊如佳人綠萼包金茸併隨重陽酒娛此憔悴翁

次韻淵明飲酒詩

有序

鄙性嗜酒親友所知也紹聖丙子得官明道寓
居宛丘職閑無事終日杜門人知其好飲也或

饋之酒不問寒暑日輒數酌飲雖不多而樂則
有餘因讀淵明飲酒詩竊愛其詞文而慕其放
達因次其韻嗟余與淵明神交于千載之上豈
敢論詩哉直好飲者庶幾耳得詩十一首

我欲常飲酒俗事苦奪之飲酒不得醉何如未飲時顛
倒衆譏笑佳處正在茲念此雖杜門濁醪日常持

出門憚應接俗士不多情對酒輒拜辭好禮以求名嗟
嗟名幾何曷足善爾生共處一泡中倏忽風濤驚好飲

信無補不飲亦何成

我久喜文詞思與鴻鵠飛
老來覺非是念昔正可悲
買金鑄杜康百拜誓歸依
晉陶與康伯九原吾與歸
涉世苦不諳多病身早衰
惟有尊中酒不與我心違

處樂非縱情處靜非避喧
豪奢與枯槁彼各據一偏
悠然獨樂處在我不在山
羲皇迹已遠三酌呼可還
一罇每獨睡不待賓客言

所嗜人不得一物百非是
猶有尊中酒道勝無敢毀
彼

我譏謗者誑口而信耳當憂十八隔罰此繆語綺

自庇無一椽道人分半宅屋西羅古殯寒草無人跡
累長與少豈復待年百鴉飛朝樹踈蟲弔宵月白平生
或不飲至此方知惜

曹參漢賢相掾吏亦豪英四海付醇酒乃真知物情亡
秦餘毒烈一洗百壺傾和氣薰醉人金革乃不鳴卑卑
談治道陋矣洛陽生

種樹東簷下雨來發幽姿微陽動九地光彩變新枝榮

衰一以異枯槁易神奇消息天使然人工徒爾為杜門
沽酒飲高懸吾馬羈

里有好事者我往樽輒開我亦為之盡每往亦開懷尚
慮數見厭動作旬月乖今晨起苦晚獨坐見烏棲冬溫
雪作雨里巷苦多泥且復閉門坐開卷理多諧誰知無
言中獨往不自迷得意復終日弭車不復回

弱歲慕世名中年頗探道世間無非苦病死與生老相
尋無窮已遞代作榮槁奇哉竺乾書百遍讀愈好汙泥

雖云濁本不害吾寶酒雖破淨律吾事在律表

昔嘗罹厄疾一卧輒踰時念無所歸咎乃誓與酒辭那
知偶不死持杯復飲茲既飲輒為盡快哉復何疑神暢
病自失此說信不欺藥石傷天和此方吾笑之

與潘仲達二首

東風沛甘雨百物一時好江南桃李盡紅紫到百草道
傍負擔子寒食歸祭禱念我淮上丘三年不躬掃

淮陽牡丹花盛不數京洛姚黃一枝開衆艷氣如削亭

亭風塵表獨立朝萬萼誰知臨老眼更復美葵藿

莎雞

金風透殘伏玉樹先秋涼
嚶嚶草間蟲感時振衣裳
楚客思萬里夜吟怨藜牀
勞勞終夕語共此簷月光
孤輪曳獨壘折管韻哀傷
辛苦幽父兄無衣畏風霜

宦遊

宦遊吾漫爾未慕致身早
秋來憶山苦遙夜夢顛倒
鳴蟲待誰聽落葉煩我掃
誰復省勞人吾生常草草

次韻秦觀

琬琰非世珍昔以羊皮換嗟君復何求衆棄乃所玩十
年少游兄閑口受客難二毛纔一第俗子猶憤惋人間
異巧拙善琢貴顏汗婢媚守重閨倚市爭倩盼君胡寶
滯貨屢辱訪哀憫譬猶卧仆塗更侑觥與散球然瑚璉
質磨琢爭璀璨遲君三年鳴更用驚我慢

阿几

小兒名阿几眉目頗疎明日來書案傍學我讀書聲男

兒事業多何必學讀書自古奇男子往往羞為儒阿几
笑謂爺薄雲無密雨看爺饑寒姿兒豈合貴富翁家破
篋中惟有書與史教兒不讀書更欲作何事

宿虹縣驛

長隄隘舟車上下無暫歇煎熬古驛門咕咕爭瑣屑東
南淮浙富輸餽日填咽楚風習喧卑吳舌動嘲哂平生
耽靜意投閑劇含噦况茲道路勤強食慰饑渴年來嵩
洛興久與泉石結終當卜吾廬雲山對華髮

有感三首

一春苦多風桃李見無幾良遊時已失忽忽三月尾中
間亦何有徒自亂心耳所嗟違所娛坐費良日晷堂北
千葉桃微本混榛枳居然未之省一日燦相視零丁不
忍摘攀玩聊自慰乃知物雖微未易即踈棄從今至零
落猶足伴尊哉仍煩芊綿草藉我花前醉

昨日鴉作巢今者鴉哺兒念知三月闌春物行已稀晚
風颯不收殘紅怨餘姿回風起輕寒擁爐火重吹燈明

夜齋靜目澁臨書遲病齒不飲酒持盃勸妻兒豈無兒
女心惆悵桃李蹊彼昏安目前丈夫方有思

古今不殊途掩卷獨長想炎爐與死灰相去如反掌彼
昏誠不知一醉富莫量那知道旁殍曾是厭盃盎一金
短販兒豈暇議得喪但憐反覆間觀者為惆悵聖賢蹈
大方不苟目前妄寄身愛憎間得失真一餉

食菜

大雨困淋漓小雨傷霖霖哀哉南畝人日夜塗手足入

倉無一粒敢望祈報福餘功歸老圃畦菜青滿目長官
卻野饋性命赦難驚何須問清白薦德芻一束歸來輟
食嘆每悔釜炊玉青衫尚如此何況膏粱腹願君少自
寬謀遠須食肉

王子開朝散早年以疾病謝事還江陰求詩為別
三首

濟物昔所務捨耕還自非駸駸老將至忽忽意多違門
有王夫子柴車謝事歸令人三歎息羞澁向塵衣

田園何日到水國
沈秋寒興來出飲酒興罷歸杜門漫
郎遊已倦老眼亂丹鉛扁舟肯載我
共看雪濤翻
避祿免危疾棄鉛得黃金
鬚眉藹如漆便覺老難侵
江湖足幽遊市卒或可尋
莫思芙蓉子丹田亂君心

暮春奉女兄弟集宴堂

晨暉麗花柳流水灑池塘
暮春漸暄燠華構肅朝涼
使君簿領暇亦復陳壺觴
班坐豈異人骨肉皆歡康
遙山出遠翠遠水明斜陽
歡言不期醉淡泊味何長

窺園

吾老懶讀書得閒嘗窺園愛此千樹雪高低不勝繁衝
風掠之去頗已隨沙塵感之可奈何我豈上木人畏病
不飲酒已慚嵇阮真淡泊非衆嗜自娛難及賓獨遊還
獨吟魚鳥與我親悠哉山林趣媿此簪纓身

馬巨濟董役魏王墳作詩寄之

城北牛脾山千丘壓其麓事皆有司辦聖世數厚族園
林迫復土百役興甚速煩我別駕公侵星次空谷郵亭

舊客去

原注二刷
錢官皆去

閑日睡頗足聞鶯有佳興徙倚近喬木

櫻筍味鼎來管絃調漸熟期歸酌燒酒及此未炎燠

出伏後風雨頗涼有感三首

秋風振秋曉萬境一淒清幽草蟲響息高葉露華凝
翼鳥尚宿引吭雖屢鳴淹留度華歲悵然難為情

三伏如湯釜熏煮理亦足西風半夜雨牕戶一清肅
那能惜搖落共喜過炎燠老人亦晨起稍進杯中醪

殘暑扇中盡新涼枕上歸微雲起平遠空碧上朝曦稍

感夏衣薄漸傷高葉稀來鴻飛集喜卒歲稻梁肥

太寧庭栢

微風起清籟烈日交翠陰陰茲金仙居樓殿鬱沈沈永
日燕雀下有時鐘梵音誰能悟斯道來此契無心

暇日步西園感物輒為詩得七篇

醠醠

欲知此園古請視醠醠蒼孫枝已輪囷走蔓龍蛇長春
風一吹噓灼灼發奇光仙妹不可挹順風飲其香

秋圃

秋圃寂無有蕭條殘菊枝老蛩依日叫暗蝶傍人飛鎖
澁門開少莎長人到稀舊遊潭記得到處即如歸

菊叢

下根盤秋泥上葉披宿雨惟餘黃金蕊秀色日夜吐寧
須薦九日但惜歲云暮吾將屑落英持泛蘭皋露

芙蓉

清霜厲嚴殺松栢氣不振芙蓉乃微木晚艷獨嬌春穠

粹覺蘭疲芬敷知菊貧欲攀無所贈聊復插吾巾

橘

奇林蘊貞粹健葉圓青鮮中有碧瑤實正味百果先貢
包登堯俎頌德列騷篇李衡空庸材徒列木奴千

斑竹

重瞳步方時二妃益老人安肯泣路傍洒淚留叢筠頗
疑葛陂化點點留斑鱗慎勿脫水去入世多埃塵

種蔬

貧舍無旨蓄種圃治寒蔬縱橫數席間灌溉亦勤劬積
雨有新甲時摘付中厨何勞樊遲學當問漢陰夫

所居堂後北籬下獲二蛇一小色赤長二尺許一
大色黑長七尺圍四五寸尾可貫百錢盡放之

二物穴我居歲月亦已老一朝雙擒獲蜿蜿出幽草安
行免噬齧敢望吐珠報已月不殺蛇昔賢有遺告

小雨效韋體

午景蔽浮雲芳林散清雨虛窓度遙吹稍覺青葉舉殘

疏知夏餘隕葉兆秋序幽獨無往來烹茶誰晤語

柯山集卷七

欽定四庫全書

柯山集卷八

宋 張耒 撰

五言古詩

納涼

靡靡春事退寂寂夏日長
日西騎馬歸卧此北戶涼
官事幸休逸甘為白頭郎
朝出暮還家悠悠愧路旁
所欣藥物靈頗覺疾病康
幸免三已愠敢希五饋漿
難堪七

有餘不過三已嘗呼兒且糲食貧固士之常

三伏暑甚七月八日立秋是日風作涼爽炎酷頓
消老病欣然命酒成二詩

西風吹淡白牕戶含淒清炎涼一朝變徂暑逝不停山
堂曉瀟洒病叟巾褐輕平時干雲樹芳葉亦復零
苦熱逢三秋西風颯然起金氣入草木傷夷從此始盛
極哀從之循環固其理老翁復何事新涼欣酒美

白樂天有渭上雨中獨樂十餘首做淵明予寓宛

丘居多暇日時屢秋雨倣白之作得三章

寒極則有暑晦久則有明開闢迄今茲此理信可憑炎
炎者易滅巍巍者必傾聖智無奈何況此愚昏氓設羅

以獵獸切骨陷其膺重勢以鎮物懸絕壓其案此下與

育力有不獲呈物情千萬變可盡得經營案此下士葛

帶而蘭纓無求復無憂容貌甚和平案此下秋氣日姿

清悠然有佳興美酒時一傾

罷官卧窮巷值此雲物稠連延經旬雨城市欲行舟柱

礎變劫塘瓦溝成暴流蕭然殘暑退寒事成衣裘老人
朝睡足起坐梳白頭呼童飭晨餐薪濕爨婦愁洗我朱
提杯不復具有羞一觴已徑醉萬事良悠悠

故人遺我酒氣味芳以清置之屋壁間興至時一傾銀
杯度一合三醕已微觥既免戒沉湎且無憂病醒嵇阮
愧令德劉石無遐齡荒狂有何樂徒以酒自名吾幸免
因此庶幾盡平生

古意

園中楊柳樹飛舞似含羞如何風靜處盡放眼中愁金
鋪銀屈膝動處有人挨碁盤作十字中心為子來橘犀
如半月何日是圓時如何一種味却有兩人知

權勢

權勢世所重桓溫役孟嘉桓公自人雄為下未足嗟頗
怪蔡中郎為董受疵瑕因之以取死曾不念漢家士固
感知已尚安知其他搜牢則可誅好豈自其佳

臨文

一病廢百嗜好文心未忘南牕納虛明羅列陳縑緗茫
昧考巢燧典章斷虞唐清妍進屈景雋永旌蘓張少狂
不自料遇事形文章誤逢作者嘆因復力披攘蹉跎生
白髮始紬石室藏粗見漢家事濡毫時否臧文詞比工
祝不殊公卿行何用疲心精舍本棄耕桑讀賦意凌雲
律令尊張湯榮華繫遇合才技無短長頗師老氏術抱
璞和其光無營以卒歲刻意翰墨場

自淮陰被命守宣城復過楚雨中遇道孚因同誦

楚詞為書此以足楚詞

秋庭新過雨佳菊獨秀先含芳良未展風氣已清妍金
鳳汝婢妾紅紫徒相鮮老人對節物昏昏祇欲眠與子
讀楚詞亶亶忽盡編孑孑兮秋風慘慄在遠行蟋蟀鳴
西堂淹留了無成

寓陳雜詩十首

傳舍不可以束裝投新居新居亦苟完佳木頗扶疎洒
掃尋丈地琴書遣朝晡風雲中夜變大雨如決渠落點

若強箭穿我老屋塗中夜起明燭移牀護吾雛傳聞北城隅老弱堤上廬官吏操畚鍤紛紛役千夫螳漏或一決城闔變江湖吾哀也久矣豈復憚為魚

昔記古甲子商滅而周興如何雨此日乃為霖雨徵陰陽久垂張此事頗有憑豈天悔牧野洗此漂杵腥舊雨水未乾洞房苔欲青新雨雖霖霖欺我牆善崩虛堂就夕眠永夜楸桐聲蕭然秋氣至豈覺巾屨輕憐我老病者三伏困薰蒸得涼且飽飯何暇念秋成

朝雨如棼絲咫尺不相辨俄然晨光漏紺碧出天面天
工易明晦頃刻俄屢變今朝事大定雲物卷組練客有
北來說鵲生被數縣穀穗無一粒遺稈如立箭旱田成
大澤投種哀莫見官人懵不知猶喜輸租辦興懷及鰥
寡猶愧吾飽飯

唐有元相國實殺顏平原平原腹有丹尸解神已仙顏
公死已矣人見如生前致令遺其像委曲與人言相國
死倉卒穢韞塞其咽家門隨手破但怪椒斛千顏公黃

塵外風節猶凜然元子墮九幽遺臭萬世傳

清夜何晏晏客眠亦復佳隣鐘喚我覺咽咽聞城笳披
衣行中庭星漢已橫斜缺月挂西南皎皎流清華莎雞
振其羽蟋蟀旁悲嗟悠哉歲已秋日月如奔車

開門無客來永日不冠履客至我老懶投刺輒復去端
成兩相忘因得百無慮故人在旁郡書信不能屢興哀
東城公將掩郊山墓不能往一慟名義真有負可能金
玉骨亦遂黃壤腐但恐已神仙裂石終飛去

疲馬齧故草閉門苔蘚深閑坊居人少秋日踈槐陰境
寂心亦閒蕭然散巾襟靜中有深趣因見至人心谷神
古不死茲理良可尋無令兒輩覺一撫無絃琴

念昔為吏日朝夕羨人間解印出公府翛然若歸山衡
茅三畝居無客門常關早眠而起晏永日或不冠故人
遠寄酒為致一醉歡我亦領其意呼兒具杯盤長閒貧
亦好安用朱其轡我生本蓬華久已傲飢寒

我不知暑退但覺衣汗乾頗怪庭中天湛然青已寬有

物叫草根啾啾自相喧問知己新秋大火流金天九土
變寒暑正爾事亦繁靜觀付一笑吾事寧相關但無筋
力健悠然佳意還喧喧憎隣里砧杵亂人眠

秦子死南海旋骨還故墟辛勤一生事空得數編書琅
琅巧言語玉佩聯瓊琚知者能幾人憎者頗有餘書生
事業薄生世苦勤劬持以待後世何足潤槁枯興懷及
昔者使我涕漣如道路阻且長悲哉違撫孤

寄李端叔二首

束髮聞至道榮辱久齊觀中年嬰世故已復傲憂患間
居雖荒寂几杖頗清晏悠悠閉晷景草草貧寢飯狂言
無為發濁酒醉自勸與君通家舊邇者頗屢見相望豈
云遠數舍隔異縣吾人師佛祖妙旨得忍榮斂藏避世
俗未免逢侮訕坐令鬢垂雪猶把從事版尺書每見警
妙語珠在貫復君進明德同遂丘壑願

陳墟自古皇疆野實楚縣沃野接神畿荒溝漕淮甸民
風靜而陋原隰平以遠我來逢艱歲禾黍秋色淺荒居

困蝨蚓風雨老藜莧閉門謝車馬隱几親筆硯馬跡巷
泥深庖烟簷日宴深居窺老易妙理殊自玩困亨方寸
足夸安勞遠願乖離感歲月老色各滿面友道古所敦
尺書冀辭倦

秋日曬古城

秋日曬古城西風振塵埃出門何所之壞道連蒿萊飛
鳴雞犬稀破屋枯壕隈老圃理蔬畦晚甲瘦未開輸人
暮出城栖鴟一一回悵然心不怡歸坐勸一杯

古意效東野二首

與君雖異坊秋涼各平分已遣月入牖更教風掃門照
君幌中寢拂君堂上塵綢繆似衣帶終日遠君身
扇不風自涼身不蘭自香深居不出門幽獨更清揚為
鵲栖君樹為燕巢君堂不食亦可飽况乃餐輝光

早稻

早稻如倒戈十穗八九折晚稻不及秀日炙根土烈踏
車激湖水車衆湖欲竭得泉如沸湯旱土濕未徹老農

祝天工叩額眼垂血游雲不作雨風至輒散滅昊天未
悔禍牲玉無徒設誰能縛妖魃救起龍潑刺

鳴蜩

鳴蜩嘒高風逮夜且復靜草蟲何為者落日鳴復逞陰
陽且戰爭微物何所競化工執其機開闔惟所命朔雁
有行意肅肅如待令江河有舊渚寧畏風霜勁

書初涼夜至將曉

原注靈
寺作

秋房燈火清人語久已寂城遠不聞更警拆鳴未息橫

參已入地斗柄當天直乃知三更中市廛已寂歷我時
守書几磨墨傾硯滴反覆小學書昏目如芒刺試尋隣
房僧翼趺背負壁體勞徑就枕冷夢分南北覺來寺鐘
鳴僧禮像前席須臾聞梵唄木魚如叩石舉頭視東牖
朝日已淡白反身起披衣神爽健筋力亟來酒甕邊側
聽聲唧唧

秋日喜楊介吉老寄藥

閒坊遠市聲終日掩衡門惟有風中葉蕭騷終日聞午

枕不成寐起坐無與言喜聞故人書珍藥幸見存其方
受仙聖其效未易論豈惟蠲沉疴庶可輔本根珍重復
珍重厥價萬璵璠永年未可冀庶保無夭昏

見黃仲達感秋意

秋風吹衡茅寂歷如荒村獨立無與語悲蟲鳴草根老
木經疾風枝葉僅得存踈蔭不滿地白日耿當軒北城
有黃仲眸子清不渾時能出秀句寶鐵雕璵璠念將舍
我去為吏國西京荒涼古中牟晝夜輪蹄奔青衫給吏

後懷惡未易論強顏詭應接有抱誰能言從容來去間

無厭走黃昏

原注黃每相訪常以昏夜

服仙靈脾酒

冷氣侵吾髀趨拜劇苦艱仁哉神農氏遺藥驅惛瘵持
錢取之市易得如茆芡繁枝與芳葉盡取無可刪貯之
白縑囊漬以壺酒寬七日以供飲跛曳皆翩躚呼兒謹
蓋藏用此九轉丹平生誤信書安坐得老邁方書豈盡
信柳子固無言事固有然者豈容盡欺謾疾走非吾願

且復補羸殘

孫志康許為南釀前日已聞糴米欣然作詩以問之

平生一尊酒風月不可無謫官將十年一醉未易圖
豈無旗亭官亦有酒壚薄乃捩齒酸一滴不可沽英
孫夫子臭味真吾徒自云得異蘖乃出粳稻腴歲久精
粹出去者乃其粗醞釀纔夾日芳甘已盈壺儉人喻其
力若火經茅蘆此語真野陋殆出負販夫前日聞言語

糴米已在途每恨乏陳糲價直如買珠憐君久客囊傾
倒無復餘假器走僕僮供我一笑娛欲為漉巾潛請學
滌器如作詩以訊之何日陳尊孟

夜書

黯黯夜烟青寥寥秋漢迴海月出天高霜雲泊天靜鶴
鳴知露寒樹影當軒正幽客獨未眠經牕夜聲磬

小雨

稍稍陰靄集肅肅春寒生牕燈耿初照小雨細無聲還

來就溫爐依然有故情燕坐悄無語軍城遶遠更

月夜懷陳永源

衆喧息遙夜爽氣漬煩襟殷勤低簷月入幌來相尋平生學虛靜每為多病侵卧想陳夫子幅巾修竹林

冬日放言二十一首

清冬萬境肅墻戶益蕭然薄寒惟可飲短景不容眠貧厨烟火暖塵釜亦烹鮮且復養口體何勞更問天

湯餅慰朝餒三杯澆旦寒醉飽外何欲昏然宵就眠幽

通夢有告默存神自全蕭蕭松竹舍歲暮聊盤桓

風雨連江氣十月如深冬坐曹日暮歸密室溫爐紅慘
慘庭下日騷騷窓外風三杯容我醉萬事聽天工

小兒喜學書滿紙如塗鴉老婦寒不績當戶理琵琶樽
中有神物快瀉如流霞三杯任兀兀凍臉生春華

卯飲終日醉萬事付悠悠醺然據榻瞑簷雨方颼颼吾
事幸無急不醉欲何求顧謂婦與子酒盡為我謀

寒羊肉如膏江魚如切玉肥兔與奔鶉日夕懸庖屋嬉

嬉顧妻孥滋味喉可欲謫官但強名比者何不足

酒聖卯時歡此語聞樂天安用苦了了白日供憂煎浮
世本幻妄空花電露然人間無實事惟醉庶幾焉

愈老愈嗜酒益醉益自然兩人同墜車醉者乃得全我
不但醉酒天和醉心源當其醉甚時更類癡與頑

至道與物反夫豈會俗心聖處有閫域局鑰一何深時
時資美酒可待及其門送君者既返君駕胡可尋

清晨坐官舍官舍復何有離披經雨菊蕭疎委風柳飽

食或至睡涉筆無可否油然有好懷日暮歸飲酒

日暮歸飲酒兒女戲我前須臾徑三酌據榻已欣然老
妻坐我傍餽馘已炮煎大勝劉伶婦區區為酒錢

我初謫官時帝問司酒神曰此好酒徒聊給酒養真去
國一千里齊安酒最醇失火而遇雨仰戴天公仁

吾腹如鴟夷但滿貯醇酒外圓故不滯中靜一無有紛
紛千百輩納若一塵垢下而至真源保之故難朽

淮陽名都會爽塏太昊墟最愛西城道汪汪數頃湖古

木巢翠鳥清濠見游魚幽居多不愜懷我平生娛

靈通古叢林他日休吾車出門循古城荒圃畦寒蔬手
種堂下花頗已數尺餘何人攬其華故人應念予

塞向久室處帘幕亦復周溫爐熾薪炭永夜炎光流五
更屋霜重重衾如無裘興懷無衣子卒歲聊優游

陶潛經世才齟齬不得肆彼寧徒嗜飲有蘊託諸醉時
時吐高詞頗復見一二義熙書甲子此意有涇渭

葛公蓋世才功業亦云偶世無左將軍老作躬耕叟皇

天挺奇產必使有所受珠玉在山淵終為王府有

秦人焚詩書意欲遂絕滅六經至今存何曾損毫髮興
哀有天理人力自淺拙不憂驪山墓回首遭發掘

元子本豪爽頗復有俗氣孟嘉亦可人乃與較權勢崛
強盡百年究竟成何事江左無英雄汝得免徒隸

淵明非無心似以酒忘憂如以藥愈疾未佳寧免憂我
直好飲耳與世本悠悠人間有何事奚足煩杯甌

四月望日自孝悌坊遷冠蓋孫氏第

青蕪滿古城白日照大澤街荒雞犬聞市遠喧闕寂中
有騰騰者淮陽四年客坐偷太倉粟穩睡而飽食平生
願陳力衰老困逼迫何曾一可意但有百無益偷安淺
夫志苟且志士惜窮通有大理誓不安苟得朱陽方肇
序春去無轍迹悵此復幾時撫事三歎息

謫官

謫官成吏隱古寺度高秋寒燈明夜室清坐聞更籌
葛屨往還感彼歲月適吾意方有會誰能賦離憂

十月二十二日晚作三首

黯黯東牖闌寂寂吾廬閒粗糲飽婦子苜蓿無餘盤
雁急天欲雨雞栖日已寒老人袖手坐一杯聊自寬
天寒聊飲酒再酌已停觴豈不欲酣暢要使夜腹康
意得樂有餘偶然不必長寄身造化中勿使天和傷

蓬蓽無與處北風利戈鋌空爐有微火且復與周旋
酒隱柴桑叟醉吟渭上賢二士忽已遠遺風載陳編

題壁

命駕欲詣客欲去復遲遲事幸無甚急何用勞驅馳家
貧幸有酒亦畧具鮮肥且復東窻下高歌醉而嬉

夜坐

萬籟聲以寂三更霜已寒老人袖手坐一氣中自存自
得此中趣不與兒曹論但有老孟光相對亦無言

任仲微閱世亭

志士抱奇策常苦不得伸及其利害出倏已亡其人今
古同此恨愚智竟誰分哀哉老任公英魄久已淪惟餘亭

下相閱世盤深根紛紛凡草木幾變秋與春朝菌與蟪蛄盡死我獨存任公不及見見其賢子孫請君利斯竒仍復大其門

感懷

枯樹桓司馬五柳陶徵君微木何足道所歎此兩人一埋柴桑骨一為九錫臣榮辱俱已矣芳穢萬世聞

次韻題李援舫子

紫髯不復見故宮無入門元子亦寂寞一丘弔遺魂興

亡兩夢幻今古一朝昏念當置是事盡此舟中樽

秋感二首

秋日無遠暉秋草無美姿殘蛩弔白日寒鳥悲空枝時
節一如此余出悵安歸強歌不成音還坐空涕垂感動
百慮遊觸心遂紛披棄捐勿復道日暮眠吾帷

秋山多遠聲日暮尤百態鳴風落高樹清澗瀉寒瀨鳴
蛸默誰憐瘖死不償罪蛩啼獨不已有慙未逢解天時
激汝曹寧自知進退吹噓成踴躍芻狗忌撤祭庭空月

宵掛園冷露晨沛嗟哉心雖忘俯事還感慨

夜思

江邊鷓鴣鳴栖我屋南樹夜深風霜寒呼鳴自相語樹頭鴉翼動樹杪雁行度朦朧見江山一一翻飛去

嘲南商

兩袖全匹帛望知江淮客深藏計算苦好鬪意氣窄愁逢湯餅盃遇鮓論甕昨市南沽茅柴歸店兩顰赤

種芭蕉

幽居玩芳物自種兩芭蕉空山夜雨至滴滴復蕭蕭涼
葉泛朝露芳心展夕飈東堂日虛靜秀色慰無聊

無題

蔌蔌鳴葉下初無風過之流年一如此慷慨使心悲平
日談堯舜立朝羞自私溫爐煖老客聊復此棲遲

大雨十日不止五月十八日晚始霽

吳穹忽悔禍淫雨霽今夕峯嶺舒紫翠雲天麗金碧深
蛙鳴遠汪涼葉墜餘滴漏屋百不憂宵眠始安席


天運

天運不暫止何啻過隙駒向來簷前日忽已牆東隅樂
者苦其疾憂者怨其舒由來盛與衰變滅皆須臾

悼逝

結髮為夫婦少年共飢寒我迂趨世拙十載困微官男
兒不終窮會展凌風翰相期脫崎嶇一笑紆艱難秋風
摧芳蕙既去不可還滴我眼中血悲哉摧肺肝兒稚立
我前求母夜不眠我雖欲告之哽咽不能言積金雖至

斗紆朱走華軒失我同心人撫事皆悲酸積日而成時
積時更成年山海會崩竭音容永茫然



柯山集卷八

欽定四庫全書

集部

柯山集卷

九至
十二

詳校官庶吉士臣汪彥博

檢討臣何思鈞覆勘

總校官進士臣程嘉謨

校對官學錄臣常循

謄錄監生臣高憲曾

欽定四庫全書

柯山集卷九

五言古詩

喜雨四首

陰陽不暫駐，今夕已秋風。
晨興綿絲冷，歲月驚衰翁。
朝烟變新鼎，小甲疏畦空。
且復一杯酒，吾生不終窮。
手種五色蕉，意待聽秋雨。
南風扇旱日，破葉萎不舉。
霧露

宋 張耒 撰

未終夕綠潤遠如許秋色入書幃已覺青鸞舞

牆東有高樹夏葉圓綠綺西風繞一夕蕭颯遠如此寒
螢疏其顛蟋蟀曉未已羣動催流光榮華難久恃

隙地秋日曉寂無鄰里音惟有草根蟲風前咽復吟悲
歌者誰子徂年驚苦心青燈夜齋靜微溫生薄衾

次韻曾存之直舍種竹

曾郎風塵表不似宰官身吏舍數竿竹鑿池水粼粼此
君不可疎亦復未易親虛心澹相授頗似南郭鄰我知

王子猷正是君輩人

贈蔡彥規

我不見蔡子杜門十日餘今日叩我門滿手攜瓊琤
鐙寫我前雜以貝與珠我愕不知報低頭驚且吁讀畢
致於懷餘光溢衿裾坐令簞瓢室磊砢堆璫璵我拙寡
所合甘為不材樗嗟君何所聞屢枉長者車我來淮南
遊靄靄子之譽驂騑走千里凡馬安能逾奈予不自量
痛鞭而疾驅常憂過所往疲憊傷吾軀願君少待我且

欲休吾駒跳奔舍其羣子樂誰與俱俯身援其類是亦
仁之徒不然但用我畏甚將逃逋何如少待之効技供
子娛我無功名願與世日益踈反慕古沮溺窮年事耕
鋤皇皇吾夫子憂世亦勤劬雖然竟何就孰若安以居
人生各有懷未用相賢愚得樂願即止安能較錙銖又
疑異所任勞逸事亦殊作歌以訊之子意當何如

寄劉聲

原注在
海州作

別君幾何時人事浩千萬身如張射侯憂愁劇強箭崎

嘔走窮縣艱苦君未見未知菽水豐已感霜露變羈孤
寄窮海親友誰弔唁析圖補冬裘乞米煮朝飯無聊猶
自思援溺固誰願人生不終否此語非我分英雄伏泥
塗暫晦久必現如予百不能理自合貧賤豈當議隱顯
而有不遇歎但思竄山林遠脫人世患有田足耕耘有
水足罩汕蕭然便終老到死百不問平生泥佛祖久已
師壁觀況將無生禪下視有為幻吾子出羣材千牛有
餘刃行當脫塵埃鳴佩侍清燕高卑各有得願勿譏尺

鷄不有行道入誰當佐堯舜時哉勿自滯功業在力勸
握手不可期此計吾行辦

寄陳九

別來常思君無異饑待哺如何偶相逢握手復告去念
初別子時芳草才及屨天時不可留再見歲云暮出門
怪子瘦告我困道路飄飄十餘里陸走復水泝古來黃
金盡壯士色亦沮斯人獨何少乃有衣食慮才高窮不
怨志大貧若富吾將告君理子其聽我佈人生不終窮

否泰亦有數子其保所有雖穎囊必露古來立功名其
始不無忤得難失自寡進銳退亦遽念君歸海瀕誰與
朝夕聚我方困而學每冀朋友助一從城北歸夢魂見
已屢願因南來者時以尺書寓

贈江瞻道

我行于四方其所急者友嗚呼得之難百不一邂逅人
心不可齊若十指於手隨其短與長亦各有所取剛或
硬而折柔有弱而仆質良文不揚中美外莫副寬壺泛

以枵狹盜迫而陋此猶其大概瑣瑣難悉究譬如選長材棄百不一有其間雖得之猶或煩矯揉我友居淮濱飲德悉自幼豈期霸旅間乃獲聞警欬嗟君如美玉外徹中乃厚埋藏困塵埃要以不可垢他人十不一子乃得八九餘虧能幾何不待勉而就乃知昔求艱特以見未久但憂奔莫及敢憚喘而走我心子所知護豁無所圓是以行於世往往得嘲詬人才如其面不自知好醜立之明鑑前乃見其可否子於我無嫌告我當告口惟

我子改過竊不敢自後嗟予迫飢寒子亦仰五斗何當
兩有歸投老作鄰叟

呈徐仲車

朝日照高簷夜霜猶在瓦纖纖牆邊柳春色已可把殘
年能幾何奔駛劇湍瀉雖無功名求衰暮亦悲咤出門
問徐子兩計決取舍為當勉自修汲汲不可暇為當飲
美酒送老在杯竿子當指我逡我即策其馬但我懶拙
姿終非服勤者

正月望夜示童子

呼童致明燭展我窓前書顧謂爾童子此豈不足歟得
意自忘偽觀一知其餘爾觀千萬燈豈與一燭殊爾豈
不欲醉舉杯傾我壺爾豈不欲飽構火烹我魚人生貪外
物要以樂其軀吾求安不足安用勞馳驅

贈敦復

敦復想為詩目見無金牛天工忌其才小邑使拘囚漫
塗以塵埃訟訊羣啾啾尚于紛紜中逸興時奔流不知

誰使之瞥爾為南遊驂騑解其紮鷹隼脫于罽山川困
搜羅風月遭嘲咻舉手聊探之縱橫爛琳瑯不有同行
人更歌而迭酬天應憫子勞久苦暫使休柰何少縱之
一放不可收歸來見我喜逸氣凌高秋我竊不自量妄
將挾其輶心知不可追子幸為我留君方嚴旗幟我亦
戒戈矛將圖詰朝見百敗非予羞

讀戚公恕進卷

世方尚纖柔子獨不可揉入皆喜啾啾子語不出口峴

然即之高俗子競嘲詬我嘗要之難快使暴其有乃知
謗之非更覺所得厚由來難小知此固可大受讀書常
辛勤世務飽經構琅琅滿編文一一可推究俗儒昧事
實文字工綵繡可觀不可用章甫冠土偶子能獨不然
渾撲謝雕鏤寧為目前玩功見施設後知心古所難形
兀實難售嗟君聽者寡風雨但孤雛又思理難常功業
亦邂逅豈令匠石斤常縮袖間手無為扣角歌且進滿
尊酌但非遽可令有所待而偶干將伏黃土氣乃在牛

斗顧君久自安蔽抑寧復又

與友人論文因以詩投之

我雖不知文嘗聞于達者文以意為車意以文為馬理
強意乃勝氣盛文如駕理惟當即止妄說即虛假氣如
決江河勢盛乃傾瀉文莫如六經此道亦不舍但於文
最高窺不見隙罅故令後世儒其能及者寡文章古亦
衆其道則一也譬如張衆樂要以歸之雅區區為對偶
此格最汙下求之古無有欲學固未暇君為時俊髦我

老安苟且聊獻師所傳無以吾言野

寄參寥

春風入楚鄉與子別經歲有客過我門携君尺書至昔
我出京師倉皇省家事遂令千里別不一執君袂又聞
子亦行杖履若飄駛雖成相思詩欲寫不可寄飄飄山
水夢時與飛錫值乃能以書來知子猶我記浮雲隨高
風聚散未可計遲君冰雪詩濯我塵埃思

送胡考甫

胡公精悍姿勇氣如秋鷹兵書百萬言揮麈談如傾羞
戴文吏冠慨然喜功名願得文二父為國作長城朝廷
士力盛戰馬如雲騰貔貅飽肉食武庫森神兵此豈不
足用麾之若雷霆如何彼疆鄰坐敢邀金繒由來在得
將選擇當至精譬如養騏驎有御乃能行安得偉大夫
長驅兩隅清淮南聽公語乃是衛霍朋終軍白面兒尚
欲請長纓縱橫老將手出袖盡一呈策馬勿自滯我將
觀厥成一奮庸將驕汎灌出精英立功報天子執節擁

旗旌男兒當封侯寧為光書生

旦起

漫漫東牖白開帷納晨光欠伸推夜枕叩齒披朝裳瓦
盪汲石泉漱濯齒頰涼維茲孟夏初宿雨清高堂栖鳥
起且啁露鶯鳴更藏悠悠曉花殷落落古柳蒼西舍初
鳴春東隣出求糧客馬已別樞商車欲踰岡羲和一揚
輝羣動皆擾攘有生無不求誰得偃于牀人生但如此
勤苦亦可傷況我病倦翩飄飄信風翔永懷中林士栖

志烟霞鄉願言寄旅跡相托以徜徉

庭草

冉冉朝雨霽欣欣禽哺雛鮮鮮中庭草佳色日已敷
童子惡其蕃謁我盡掃除我為再三擷愛之不能鉏人生
羣動中一氣本不殊柰何欲自私害彼安其軀況我麋
鹿性得此亦可娛延蔓藩籬間常若田野居亭亭濯露
曉偃偃披風餘所嗜乃若此我生合樵漁

寄荅參寥五首

昔我初見子子時客京師聞名久不獲既得過所知示
我一卷書大小百首詩我嗜不可輟熊蹯朝飢約子
彭城遊念當行有期中間忽倉卒決去不予辭子後來
高郵我居淮之湄中間無百里詩句履欲馳客來得子
書云子久南歸投書不能讀恨我聞之遲使我早知此
扁舟尚能追遠別不執手近居不相携每念今悵昔耿
耿衷腸悲子行日已南我去日已西音書不可頻何以
慰我思

蘇公守吳興山水方有主子兮從之遊挂錫當可駐塵埃
困孤鶴念子久失所秋風展其翼道使萬里去青雲
引高唳爽絕誰敢伍予駒欲西秣東我江海艣平生
二三子往往在南土子才得所樂我拙日益魯拳拳相
思心契濶不得語

秦子我所愛詞若秋風清蕭蕭吹毛髮肅肅爽我情精
工造奧妙寶鐵鏤瑤瓊我雖見之晚披豁盡平生又聞
與蘇公復與子同行更酬而迭唱鐘磬日撞鳴東吳富

山水草木餘春榮悲予獨契濶不得陪酬賡

我生為文章與衆常不偶出其所為詩不笑即嘲詬少
年勇自辯盛氣爭可否年來知所避不敢出諸口時時未
免作包以千龍厚依心讓免曹默默衆人後見君不能
已頗亦陳所有君豈少取之時以佳句授幽絃喜有聽
清唱慰孤奏如何瞥然去使我不得友

蕭蕭江湖客踈瘦若秋竹苦心為詩章日夜撓心腹清
絃無浮聲促柱有哀曲湔湔幽巖泉一一清可掬人生

予文章初若力不作及其成欲售又困瞽者目子從吳
興公乃獨獲所欲得意有知賞幽懷免窮猶嗟予有所
投痛學自藏覆子當慰我窮時寄書數幅

夏日雜感四首

我前十日至柳葉不蔽日我後十日來芳條如紺室枝
間有好鳥鳴和若琴瑟渠渠哺其雛啄我園中實稍稍
筍成竹濯濯草過尺心驚歲已半念此日月疾朝來數
葉隨盛憂有萎色悲哉一陰生長養從此極

士而懷其居孔子亦云非賢臣事晉侯夜載使逃齊酖
毒比晏安君子不可怡樂小必害大安近遠之迷野芻
養騏驎當念和鑿馳一飽願即止幾何非犬雞高賢意
有在汲汲不敢遲安能守槽櫪長伴兒曹嬉

羣動入夜息我歸亦安眠脫我身上衣援枕體晏然朝
日常營營有生不可閒羲和散其光幸此須臾間人生
一世中大小無百年胡為不自暇長抱勤苦歎才者勇
設施誕者夸勢權彼有驅其心欲休諒無緣我本與世

踈少嘯老成頑何為不引去坎珂行所難

娟娟簷前月雖缺猶媚好團團理絲蟲養身恃其巧無
能老蝙蝠乘夜出堂奧那能捕飛蚊未解聒耳聞悲歌
草間蚓辛苦自鳴噪爾生可以默何所欲而躁鳴蛙訴
其渴謂若天可禱瘖蟬死不鳴豈以訢無效悠悠羣動
情誰得辨醜好我歌豈徒然亦用自警告

和周楚望

宿雨生曉潤繁雲滋暑陰我居廢不葺常苦積雨侵果

墜厭風惡草沉知潦深拳拳抱幽歎耿耿嬰煩襟吾子
久不來幽居誰見臨飄然得秀句生我江湖心一官亦
漫爾勤苦安能任何當舍此去拂我塵埃琴飢寒仰五
斗求尺而忘尋悲我復契濶誰復知吾音

秋日晨興寄楚望

夜雨霽清曉浮雲散涼川幽人理青髮汲彼石井泉焚
香展素帙持珠諷妙言晨暉淡悠揚秋霞麗紺天萎花
開露餘孤葉零風前感此芳節晚長嘯心悠然傾觴散

滯念繁菊留華年年落歲暮心非君誰與宣

感秋呈宏父兼呈周楚望三首

西風吹我舟繫纜岸邊柳蕭蕭落船葉日夕煩我帚心
驚芳歲晚日月去如走搔我鬢邊髮少壯寧復久平生
拙謀身辛苦為五斗苟逃飢寒憂不敢擇所受心因摧
折低面苦塵埃垢拳拳警前勇俛俛蹈新闕功名委之
命寧足計薄厚獨遺古人書千古相獻侑我烹亦有魚
我酌亦有酒非求與俗違聊以安吾守

西風中夜來飛雨隨以至攬衣不能眠起坐為涕泗炎
蒸雖云酷香草猶可佩清商來無情凋我蘭與蕙唧唧
草蟲悲裊裊露蟬嚙高粱燕如客鍛翻鷹方鷲乾坤本
無心萬物隨一氣如何於其間感愴坐自累置之勿復
道得酒但知醉陶然杯杓間蕭洒無餘事

浮雲無停陰急雨來清秋颯颯水上風吹我千里舟二
年客淮楚乞米充飢喉空堂堆詩書冷落妻子羞操舟
將何之漫浪為西遊豈不厭奔走貧賤無良謀人生天

地間如萍水中浮安得必所往南北但隨流達者知其
然委已任去留止若寄渚雁行如浮海桴萬物本無事
百年漫多憂真懷付造物俯仰予何求

和登城依子由韻

步登高城望望望殊未已惟時歲將窮冬孟月魄死紛
吾方有懷一坐為三起悲歌擊枯枿聲與淚俱至人生
隨大鈞命不貸君子付之無如何外垢資內洗前知賤
終吉外頗與愚似開門張瓊瑤誰者目不寄支離冒多

福嬋娟畏獨美舉頭蒼天高歎此青雲士酌公芳尊酒
願公百憂止履善神所勞安置目前事

西華道中

我行陳許郊千里平若掌居民雜荆榛耕少地多曠野
兔乍跳奔驚鷺或高颺喬林多疾風寒澗有餘漲棘籬
蔽茅屋雞犬入村巷主人掃土塌秣馬具朝餉童兒汲
土井敗飯堆瓦盎勿悲為生陋自足無他望嗟予走薄
宦奔走年將壯長抱羈旅愁何時稅歸鞅

泊南京登岸有作呈子由子中子敏逸民

客行歲云暮孤舟衝北風出門何蕭條驚沙吹走蓬北
涉灘河水南望宋王臺落葉舞我前鳴鳥一何哀重城
何諠諠車馬溢四郭朱門列大第高覺麗飛閣湯湯長
河水赴海無還期蒼蒼栢與松岡原常不移覽物若有
歎誰者知我心口吟新詩章子撫白玉琴鳴琴感我情一
奏涕淚零子期久已死何人為我聽推琴置之去酌我
黃金壘幽憂損華姿流景良易頽

宿合溜驛

空庭野雀噪客至休我駒盡日衝塵沙解裘振裳裾熒
熒青燈光夜永寒堂虛破窓見星斗明月照廣除篝火
旋烹煎妻兒具盤盂強飯一為飽困眠體微舒嗟我山
野姿懶拙與世疎如何強所難忘躡仕進途已習未易
舍欲行倦馳驅悲哉不早計既晚空嗟吁

至日離許州

先王重至日靜息資微陽閉關絕商旅后為不省方戎

獨何為者古寺嚴晨裝酌酒飲僅僕披裘冒朝霜眷彼
道路人熙然樂而康尊酒送為壽華衣冒鮮粧懷古固
非士遠客亦可傷悠哉任行止且復傾吾觴

沈丘道中

霜霧沈遠星芳林語春鳥客昨帶餘睡馬力健清曉凝
烟披草際初日動林表心隨和風快興與飛雲杳芬菲
悵已晚夏陰生桑棗慷慨一據鞍此懷殊未了

感事二首

投老益無趣誤為世塵嬰飄然欲脫去疲弱安能耕始
謀苦不臧妄欲事功名中路兩不可傍徨始嗟驚回轍
愴已晚悠悠事遠征萬物各有求我生安得寧

自古衣食勤物生無時閒春耕望時雨厚土常苦乾舉
頭呼天公天遠安得聞幸此中夜雨瀟瀟洒中田天人
雨異情相值良獨難水旱與豐年由來皆偶然愚夫苦
多怨智士即而安我歌寧獨此萬事一嗟歎

漫浪翁

劉壯與年過壯久不仕嗜學著書自名漫浪翁
所居之園林堂室皆以是名之求予為詩因記
之

堂有書萬卷園有竹千竿逍遙于其間漫浪追昔賢乃
祖首陽人疾世餓空山堂堂秘書公赤手犯鯨鱷後來
得吾子門戶真有傳已信懷道貴預知行世艱婆娑欲
頭白不肯彈其冠我頃未見之千里知肺肝不惜委珠
玉投我書數編我窮安放逐老去頗知田君獨胡取之

學問攷淵源江鄉歲已晏幽獨抱悵悵何當一杯酒與
子相周旋

發岐亭宿故鎮三首

我別竟陵時楚稻如碧絲秋風發齊安稻穗如植旗流
年去荏苒客路何逶迤弛擔終未卜永負山中期

乘月入秋山月午山蹊靜森森松竹林夾道散疎影陰
風留暗壑白露蒙朝嶺耿耿村雞鳴坐感單衣冷

征人不敢安蓐食待明發潤衝石上雲冷踏松間月艱

難付一笑歲月驚屢閱偃亞道傍松茯苓應可掘

獨遊東園

清曉步東園獨遊悵無侶菰蒲綠已深鵝戲春塘雨
取酒就花傾隔林邀客語歸來春興闌睡起日停午

同毅夫賀無斁教授

吾聞寬甸民盜若春竹笋異時用武吏搏擊縱鷹隼洋

洋劉太守

原注貢父治曹不用刑而盜衰

豈弟發素蘊凶年盜乃滅見謂

君子敏先生衍詩書循吏副憂軫庶幾從風靡少緩束

濕緊君家龐眉伯學行我標準捧書見華髮應為一笑
曉

喜晴有感呈晁郎

山城淫雨霽曉戶含餘清老人午睡足杖策遶荒庭長
夏吾廬亦清陰交衆榮茫茫榛莽中萱草揚其英植杖
視天壤悠然感浮生淹泊且無數人事亦難恒一旦舍
此去觸物不無情何為久戚戚遇酒但知傾

春雪二首

春雲驕不行凍雨作飛雪夜深歸無燭已覺馬啼滑那
知事未已通夕注不歇堂寒曉附火簷滴更清絕前者
城東遊桃李粲已發陰陽不可料寒氣晚猶洩青青高
坡麥舊事日可閱當春望時雨盛雪或為孽生民常苦
勤不敢愛膏血如何待一飽常苦神物奪茫茫元精理
未易論本末解裘換斗酒莫畏衣百結

天寒城南寺門外無馬迹東風雪疾消春泥深一尺豈
無老款段畏蹶不敢策還歸見兒女怕冷不下席揚雄

玄未就雙鬢頰已白雖云客載酒此意終岑寂功成則
有命生事亦人力胡為不自勤守此欲何獲田桑既有
裕醪醴亦餘溢嗟哉好事客從古百無一

柯山集卷九